



2015 թվականի ապրիլի 18-ին, Ջավախքի Խանդո գյուղում միաժամանակ կատարվեց երկու պատմական արարողություն՝ օծվեց Սուրբ Խաչ եկեղեցու նոր զանգը և կանգնեցվեց Հայոց Ցեղասպանության նահատակների հիշատակի խաչքար:

Խանդոյի Սուրբ Խաչ եկեղեցուն կատարվեց եկեղեցու նոր զանգի օծման արարողություն և ժամերգություն: Եկեղեցու նոր զանգն օծվեց ձեռամբ Սամցխե-Ջավախք և Ծալկա տարածաշրջանի ընդհանուր առաջնորդական փոխանորդ Տեր Բաբգեն վրդ Սալբիյանի, մասնակցությամբ Ախալքալաքի Սուրբ Խաչ եկեղեցու և հարակից գյուղերի հոգևոր հովիվ Տեր Տաթև քահանա Մարությանի և Արակովայի Սուրբ Գևորգ եկեղեցու և հարակից գյուղերի հոգևոր հովիվ Տեր Թադեոս քահանա Տեր-Մկրտչյանի:

Հավարտ սրբազան այս արարողության նորած զանգն արդեն Եկեղեցու գմբեթին էր: Այնուհետև Հայոց Ցեղասպանության 100-րդ տարելիցի առթիվ խորհրդանշական 100 դղղանջ հնչեցվեց Խանդո գյուղի Սուրբ Խաչ եկեղեցու զանգակատնից:

Ապրիլի 18-ին Խանդոն բազմամարդ էր: Ձեռամբ Սամցխե-Ջավախք և Ծալկա տարածաշրջանի ընդհանուր առաջնորդական փոխանորդ Տեր Բաբգեն վրդ Սալբիյանի կատարվեց նաև խաչքարի օծման նվիրական արարողություն: Հայոց Ցեղասպանության նահատակների հիշատակը հավերժացնող խաչքարը կանգնեցվեց Խանդո գյուղի երիտասարդների կողմից: Քանդակագործ՝ Սոս Հակոբյան:

Բացման արարողությանը ներկա էին՝ ՀՀ ԳԱԱ պատմության ինստիտուտի տնօրեն, ակադեմիկոս Աշոտ Մելքոնյանը, ԶԱՀ-ի հոգաբարձուների խորհրդի նախագահ Սոս Սահակյանը, «Ջավախքին աջակցություն» հիմնադրամի գործադիր տնօրեն Աշոտ Հակոբյանը, Ախալքալաքի շրջանից ընտրված մեծամասնական պատգամավոր Սամվել Պետրոսյանը, Ախալքալաքի Շրջանային ժողովի նախագահ Համլետ Մովսիսյանը, Ախալքալաքի Վարչության նախագահ Էդուարդ Աղասարյանը, Նինոծմինդայի Վարչության նախագահ Գագիկ Ղարսյանը և մտավորականներ, մանկավարժներ և այլք:

